

Headlines

1. लेफ्टिनेंट गवर्नर मनोज सिन्हा होरें जम्मू-कश्मीर च आतंकवाद करी प्रभावत परौआरें गी न्याऽ उपलब्ध करोआने दी अपनी वचनबद्धता गी फही पक्का कीता ऐ।
2. मुखमंत्री ओमर अब्दुल्ला होरें कुलगाम च होए दे नुकसान दा आकलन करदे होई आखेआ ऐ जे उं'दी सरकार, प्रभावत परौआरें गी पूरी-पूरी मदद उपलब्ध करोआने लेई वचनें बज्झी दी ऐ।
3. भारती वायु सेना नै उधमपुर च ल्हास-पस्सियां पौने करी प्रभावत होए दे इलाकें च राहत सरबन्धी जतनें गी तोड़ चाढ़दे होई 5 इशारिया 9 टन राहत समग्री पुजाने दा कम्म कीता ऐ।
4. उत्तर रेलवे आसेआ कल्लै थमां अगले 5एं दिनें लेई कटरा ते संगलदान बश्कार मुकामी जात्तरी रेल सेवा चलाने दा ऐलान कीता ऐ।
5. मौसम विभाग नै जम्मू-कश्मीर च हौली बरखा दी पेशगोई कीती ऐ। जम्मू-श्रीनगर राश्ट्री जरनैली सिङ्क अजें बी गड्डिएं दी आओजाई लेई बंद ऐ।

<><><><><><>

LG-Terrorism

उपराज्यपाल मनोज सिन्हा होरें जम्मू-कश्मीर च आतंकवाद करी प्रभावित परौआरें गी न्याऽ दोआने दी अपनी वचनबद्धता गी फी पक्का कीता। एहू गल्ल उनें छत्तीसिंह पोरा शहीद सिंह वेलफेयर आर्गनाइजेशन दे प्रतिनिधिमंडल कन्नै मलाटी करदे होई आक्खी। 20 मार्च 2000 गी पाकिस्तान प्रायोजित आतंकवादिएं अनंतनाग दे छत्तीसिंगपोरा च 35 सिक्खें दा कल्लेआम करी दित्ता हा। प्रतिनिधिमंडल नै उस घटना दी परतिए जांच करने दी मंग कीती ऐ। उपराज्यपाल होरें भरोसा दोआया जे प्रभावित परौआरें कन्नै पक्क गै न्याऽ होग। इस मामले च जांच कीती जाग ते इसी पूरी संवेदनशीलता कन्नै दिक्खेआ जाग ते इसी तरजीह दित्ती जाग। उनें भरोसा दोआया जे योग्य परौआरें दे मिम्बरें गी नियुक्ति पत्तर ते स्वयं रोजगार आस्तै माली इमदाद दित्ती जाग।

<><><><><><>

CM-Kulgam

मुखमंत्री उमर अब्दुल्ला होरें कुलगाम जिले दा दौरा लाया ते हाड़ ते ल्हास-पस्सियां पौने करी होए दे नुकसान सने राहत ते बचाव कम्में दा जायजा लैता। इस मौके पर होर दुए वरिष्ठ अधिकारी बी उन्दे कन्नै मौजूद हे। अपने दौरे दरान उनें प्रभावितें कन्नै बी गल्ल कीती ते उत्थे ढांचे गी पुज्जे दे नुकसान दा जायजा लैता। मुखमंत्री होरें पुर्नबहाली आहले कम्मै सने जरूरी सेवाएं दी फौरी बहाली पर जोर पाया। उनें प्रभावित परौआरें गी सरकार आसेआ हर मुमकन मदद दा भरोसा दोआया। इस मौके पर बोलदे होई उनें आखेआ।

<><><><><><>

IAF-Rescue

भारतीय वायु सेना नै जम्मू-कश्मीर च ल्हास-पस्सिएं करी प्रभावित इलाकें च मानवता दे आधार पर इक व्यापक अभियान चलाया। इक सोशल मीडिया अपडेट च, वायु सेना दी पच्छमी वायु कमान ने दस्सेआ ऐ जे जम्मू-कश्मीर च उधमपुर दे पस्सिएं कन्नै प्रभावत इलाकें च, उन्नै 5.9 टन खाने-पीने दा समेयान ब्हाई ज्हाजै राहें पुजाइयै इक साहसिक मिशन गी अंजाम दित्ता। हिमाचल प्रदेश च, तौले ते जोखम भरोचे अभियानें दे कारण 17एं घैंटें दे

असरदार जतने नै 540 लोकें गी बचाया ते उत्थुआं कट्टेआ गेआ। इ'नें मिशनें दी कामयाबी यकीनी करने आस्तै चार हेलीकाप्टर ते 35एं दे चालक दल ने लगातार संचालन कीता। उधमपुर बुरी चाल्ली प्रभावत होआ ऐ, जेहू डा भारी बरखा, चानचक्क हाड़ ते पस्सिएं दा सामना करा'रदा ऐ। भारती सैना, राश्ट्री आपदा मोचन बल (एनडीआरएफ) ते राज्य आपदा मोचन बल (एस.डी.आर.एफ) ने भारी बरखा दे कारण जम्मू-कश्मीर दे प्रभावत इलाकें च बड्डे पैमाने पर राहत अभियान चलाए दे न। अधिकारियें जकीन दोआया ऐ जे राहत जतन जारी रौहडन।

<><><><><><>

JMC-Commissioner

जम्मू-कश्मीर च होई दी भारी बरखें ते आए दे चान-चक्क हाड़ें मगरा जम्मू म्युनिसिपल कार्पोरेशन दे कमिशनर डॉ. देवांश यादव होरें जम्मू दे लोकें गी अपील कीती ऐ जे ओहू सतर्क ते सौहगे रौहना। उनें आखेआ ऐ जे हाड़ें करी प्रभावित इलाकें च पानी करी पैदा होइ, सकने आहली बमारिएं दा खदशा बने दा रौहंदा ऐ ते इंदे थमां बचाऽ लेई लोड़चदे हीले करना लोकें दी सेहत लेई अत्त लाजमी न। अपने इक स्नेह च उनें आखेआ।

<><><><><><>

Reasi-Admin

रियासी दे जिला प्रशासन नै बरखें ते हाड़ें दी मारै हेठ आए दे लोकें गी राहत उपलब्ध करोआने लेई 90 लक्ख रुपें दी रकम जारी कीती ऐ। रियासी दिएं डिप्टी कमिशनर निधि मलिक होरें हाड़ें मगरा चलाए जा'रदे राहत ते पुर्नबहाली आहले कम्में च हासल प्रगति दा जायजा लैने लेई कल इक बैठक लाई। इस मौके पर उ'नें सभ्भनें एस.डी.एम-एं ते तैहसीलदारें गी आखेआ जे ओहू जिले च होए दे नुकसान दा आकलन करने मगरा राहत सरबंधी मामलें बारै रिपोर्टां जमा करोआन तांजे तौले शा तौले राहत सहायता जारी कीती जाई सकै। उ'नें सरबंधत अधिकारिएं गी इब्बी निर्देश दित्ता जे ओहू मरम्मती आहले कम्में च तेजी आहनन ते तौले शा तौले पुर्नबहाली आहले कम्में गी जकीनी बनान।

<><><><><><>

Railway-Train Services

उत्तर रेलवे आसेआ श्री माता वैष्णो देवी कटडा स्टेशन ते संगलदान बश्कार 5 दिनें लेई कल्लै थमां रेल सेवा चलाई जाग। एहदे कन्नै बरखें ते चानचक्क हाड़ें करी रियासी ते रामबन च फसे दे यात्रिएं गी स्थूलत होग। एहदे कन्नै महत्वपूर्ण रस्तें लेई राबता उपलब्ध होग। इनें रेल सेवाएं दे समें दी जानकारी उत्तर रेलवे दे आधिकारिक सोशल मीडिया हैंडल्स थमां लैती जाई सकदी ऐ।

<><><><><><>

JK Bank UT Adm

जम्मू-कश्मीर बैंक नै माली ब'रे 2024-25 लेई केन्द्र शासित प्रदेश दे प्रशासन गी कुल 130 करोड़ 77 लक्ख रुपें दे लाभांश आहले चैक जारी कीते न। जम्मू-कश्मीर बैंक दे मैनेजिंग डरैक्टर ते मुख्ब कार्जकारी अधिकारी अमिताभ चैटर्जी होरें राजभवन जाइयै लेफ्टिनेंट गवर्नर मनोज सिन्हा होरें'गी एहू चैक सौंपे। एलजी होरें बैंक आसेआ दर्ज कीती गेदी प्रगति दी सराहना करदे होई आखेआ जे बैंक गी अगगे बी लौहके उद्यमें गी बढावा दि'ंदे होई लगातार तरक्की-बाद्दे दी बत्तै पर अगडे बधदे रौहना लोड़चदा ऐ। जम्मू-कश्मीर बैंक दे मुख्ब कार्जकारी अधिकारी होरें जम्मू-कश्मीर च समग्र, सामे ते टिकाउ आर्थिक विकास लेई मिशन युवा गी सैह्योग देने ते उत्कृष्ट सेवाएं गी अगगे बी बरोबर जारी रक्खने दी बैंक दी वचनबद्धता गी पक्का कीता।

<><><><><><>

Power-Cut

जम्मू च बिजली दी बंडु सरबन्धी कारपोरेशन रक्ख-रखाऽ आहले कम्मं लेई केई इलाकें च बिजली कटौती दा ऐलान कीता ऐ। जम्मू दे जेहडे इलाकें च अज्ज बडुलै 8 बजे शा दपैह्नी 2 बजे तगर बिजली बंद रक्खी जाह्ग उंदे च डोगरा हॉल, रिहाड़ी, जीवल, बस स्टैंड, रघुनाथ बजार, मांडा, न्यू प्लॉट ते जम्मू कन्नै लगदे होरने इलाके शामिल ना। इ'आं गै सांबा ते एहदे कन्नै लगदे इलाकें च अज्ज बडुलै 7 बजे शा दपैह्नी 11 बजे तगर बिजली दी कटौती कीती जाह्ग। तोआई कल 8 सितम्बर गी विजयपुर ते बंदराल च बडुलै साड्डे 6 बजे कोला लेइयै दपैह्नी साड्डे 12 बजे तगर बिजली दी सप्लाई बंद रौह्ग।

<><><><><><>

Weather-Traffic

मौसम विभाग नै औंदी 12 सितम्बर तोहडी जम्मू-कश्मीर च रूकी-रूकियै बरखा बरने ते गरज-चमक दी पेशगोई कीती ऐ। उ'आं मौसम विभाग नै इब्बी साफ करी दिता ऐ जे इस अवधि दरान मौसम च कोई बड्डी तब्दीली दिक्खने गी नेई लब्भोग। मौसम विभाग मूजब, अज्ज ते कल केई थाहें पर हौली बरखा बरी सकदी ऐ। जम्मू खित्ते दे किश जिलें च चिरें रातीं जां बडुलै सवेला बी दरम्याने दर्जे दी बरखा बरने दे असार ना। औंदी 9 शा 12 सितम्बर मझाटै प्रदेश दिएं टामीं-टामीं थाहें पर बरखा बरी सकदी ऐ। तोआई मुगल रोड ते श्रीनगर-सोनामर्ग-गुमरी सिडकै पर छड़ी हौली मोटर गड्डिएं गी आओजाई दी खुल्ल दिती गेदी ऐ जिसलै के जम्मू-श्रीनगर राश्ट्री जरनैली सिडक अजें बी बंद ऐ। राश्ट्री जरनैली सिडकें सरबन्धी भारती प्राधिकरण नै अपने अमले ते मशीनें गी बरोबर कम्मै पर लाए दा ऐ तांजे सिडकै पर गड्डिएं दी आओजाई तौले शा तौले ब्हाल कीती जाई सकै। लोकें गी सलाह दिती गेई ऐ जे ओहू सिडकै गी ब्हाल करने दा कम्म मुकम्मल नेई होने तोहडी इस सिडकै पर सफर नेई करना। इस बारै होर मती जानकारी देआ करदे उधमपुर दे डीएसपी ट्रैफिक जीतेन्द्र सिंह बाईट

<><><><><><>

PTC-Announcement

आकाशवाणी जम्मू दे क्षेत्रीय समाचार एकांश आसेआ जम्मू जिले लेई अंशकालिक संवाददाता यानि PTC लेई दरखास्तां मंगियां गेइयां ना। इच्छुक आवेदक जेहदी उमर 24 थमां 50 बरें दे बश्कार ऐ ते ओहू जम्मू जिले दा रौहने आह्ला ऐ, एदे लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 बरें दा तजुर्बा होना लोडचदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबन्धत लोडचदे उपकरणें वगैरा दा इस्तेमाल करना बी औना चाईदा। आवेदक जिला सदर दफ्तर दी 10 किलोमीटर दी हद्द दे अंदर-अंदर रौहदा होना चाईदा ऐ। दरखास्त ते लोडचदे दस्तावेजे दी कॉपी मेदवार गी क्षेत्रीय समाचार एकांश आकाशवाणी पंजतीर्थी जम्मू च 14 September 2025 संजा 6 बजे कोला पैहले- पैहले आइए दस्ती जमा करोआनी होग। इस बारै व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

<><><><><><>